



名家表選卷之二

進刑統表

竇可象

臣聞虞舜聰明始恤刑而御物漢高竇達先約法以臨人
蓋此冊書輔於皇極禮之失則刑之得作於良而弊於貪
百王之損益相因四海之準繩斯在如銜勒之持逸駕猶
邪郭之域群居有國有家其來尚矣伏惟 皇帝陛下竇
圖攸屬駁命是膺象日之明流祥光於有截繼天而王垂
洪覆於無疆乃聖乃神克明克類河圖八卦惟上德以潛
符洛書九章諒至仁而默感哀矜在念欽恤爲懷網欲自
密而疎文務從微而顯乃詔執事明啓刑書俾自我朝彌
隆大典貴體時之寬簡使率土以遵行國有常科吏無敢

侮伏以刑統前朝創始群彥規爲貫彼舊章采綴已從於撮要屬茲新造發揮愈合於執中臣與其官臣某等俱效檢尋庶無遺漏夙宵不怠綴補俄成云云臣等幸遇文明謬參憲法金科奧妙比虧洞達之能丹筆重輕徒竊討論之寄將塵容覽惟俟嚴誅

黃州貢上表

王元之

乍離近侍猶聚專城循省尤違彌深感泣伏以黃州地連雲夢城倚大江唐時版籍二萬家稅錢三萬貫今人戶不滿一萬稅錢止及六千雖又樂昇平尚未臻富庶永言養活亦藉循良如臣庸愚曷副憂寄謹當勤求人瘼遵奉詔條塞囂訟之民東縛檢脩之吏敢言課最庶免曠遺况

當求理之朝必爲無言之政伏念臣叨司帝誥又歷周星既不曾上殿求見天顏又不曾拜章論列時事入直則閉閣待制退則杜門讀書雖每日起居實錄晝夜不舍寢食殆暇恐煩醫官自後茶預史臣同脩實錄晝夜不舍寢食殆忘已盡建隆四年見成一十七卷雖然未經進御自謂小有可觀忽坐流言不容絕筆夫讒謗之口聖賢難逃周公爲鴟鴞之詩仲尼有桓魋之歎蓋行高於人則人所忌名出於衆則衆所排自古及今鮮不如此伏望 皇帝陛下雷霆震怒日月迴光鑒曾參之殺人稍寬投杼察顏回之盜鉢或出如簧未令君子之道消惟賴聖人之在上况臣孤貧無援文雅備身不省附離權臣祗是遭逢 先帝但

以心無苟合性味隨時出一言不愧於神明議一事必歸於正直愠於群小誠有諂詞謀及卿士豈無公論以至兩朝掌誥四任詞臣紫垣最忝於舊人白首不離於郎署以微臣之行已遇陛下之至公義當辯明未敢伸理今則上國千里長淮一隅雖云守土之榮未免謫居之歎霜摧風照芝蘭之性終香日遠天高葵藿之心未死仰望旒宸不勝涕洟

駕幸河北起居表

楊大年

羣幕稽誅變興順動羽衛方離於象魏天威已震於龍荒慰邊氓後后之心增壯士平戎之氣臣聞涿鹿之野軒皇所以親征單于之臺漢帝因之耀武用殲夷於兇醜遂底

定於邊陲五材並陳蓋去兵之未可六龍時邁因化順以必誅矧朔漠辟妖腥膻雜類敢因膠折之候輒爲鳥舉之謀固已命將出師擒俘獻馘雖奪明王之帳未焚老上之庭是用親御戎車躬行天討勞軍紐柳之壁巡狩常山之陽師人多寒感恩而皆同挾纊匈奴未滅受命而孰不忘豕行當肅靜塞垣削平夷落梟梟頭之首收督亢之圖使遼陽八州之民得聞敷教榆關千里之地盡入提封蛇豕之穴悉降干戈之事未戢然後登臨瀚海刻石以銘功陟降雲亭泥金而典禮遠追八九之迹未垂億萬之年臣忝守方州莫參法從空厲請纓之士慙無扈蹕之勞唯聆三捷之音遠同百獸之舞

謝賜衣表

楊大年

某年月日臣某荷蒙 聖恩賜以某衣者誠歡誠忭頓首
頓首謹言解衣之賜猥及於下臣挾纊之仁更均於列校
光生郡邸喜動軒門伏以 尊號皇帝陛下誕膺元符恭
臨大寶惠務先於建下志惟在於愛人鳥獸毳毛俯及嚴
疑之候衣裳在等妾推賜予之恩在渙汗之所沾雖容光
而必照如臣者任叨符竹地僻甌吳奉漢詔之六條方深
祇畏分齊官之五服忽荷頒宣纂組極於織華純錦加於
嚴密璽書下降切窺雲漢之文驛騎來臨更重皇華之命
但曳婁而增惕竇首被服以難勝矧於戎行亦膺天寵干城
雖久皆無汗馬之勞守土何功獨懼濡鵠之刺仰瞻宸極

惟誓糜捐

汝州謝上表

楊大年

沉疴初釋寵寄蕭臻祇命惟寅飭裝靡暇初臨郡閣獲見
吏民揣已若驚戴恩罔措伏念臣本由單弱特稟方愚以
童刻之微能際帝圖之亨會驟參綸掖獲草芝函屬以堯
德彌文漢辭爾雅雲章有爛諒黼黻以何施天律惟精亦
哇咬之罔棄居常摩厲徒益空踈俄踐內庭預司密命值
皇闈之有慶苞清蹕以多歡窺雲瑞於封中聽棹歌於汾
曲四巡第頌誠辯艱之絕聞一豎興妖致冥煩之坐遣偶
嬰沉痾遂劇支離因請急以歸寧遽迷魂而不復率由蹇
否自抵困窮矧以最爾之軀然去職羈孤至甚嬰嫉居

多嘖有煩言實盈庭之可畏豁然大度終如地以見容比
及跽平果蒙齒叙此蓋尊號皇帝陛下仁深慘怛德茂
欽明軫舊故以興懷俾肖翹之遂性特加采錄令獲便安
況臨汝舊邦陪京近輔姬文之化所及首載殷詩地官之
籍攸分寔繁兵賦土多巖險民或惰游置使劭農抑惟令
典分條察俗蓋有新書臣亦夙侍疑嚴潛窺律度敢忘瘁
盡以奉化成然念臣早以斷斷之薄材獲齒振振之近列
典司訓誥就望威顏讀銘字於湯盤時瞻景式載史言於
董筆獲次舊聞外命邁屯榮階絕迹酒泉素願敢望於生
歸麗正殘編幾成於死恨今者星幾接吟竹使長人預方
國之頒書稟天臺之布憲水滌土厚足養於稿骸書訪文

修冀無於秕政親末光而彌阻感再造以難勝

賀冊皇太子表

劉筠

前耀開祥東闈播憲漢儀丕赫天下之本既豐周制協敷
王者之基克固殊尤顯會中外祇懼恭以十翼垂言黃離
之象攸著四瀆流潤重海之歌載揚于以示元吉之有孚
表善利之需廣正人倫而張大紀統天序而荷亨衢陪翼
至仁登閔昌祚允鍾聖嗣克奉宗祧伏以皇太子器本
夙成智包妙用挺溫姿而玉裕藹淑度以金相至性迪乎
天經積粹發乎真系而自桂房毓秀茅壤疏榮有時敏之
進脩有日躋之駿惠固以悟喬枝而奉順詢內衛以宣勤
務近老成之人歷觀盛德之事寶忠信而由已服禮樂以

蹈中造理惟微振辭有典侍鑿游而儼若拱列欽瞻省臺
膳以肅如慈宸敦眷四學總於上序百行紀於司成治乃
懿教被乎寰宇建儲之論繫先親而是宜立愛之文稽古
道而斯順肇膺徽冊有慶昌辰伏惟 尊號皇帝陛下闢
長世之善經率保邦之大法翕受祕祉備舉縉儀 上帝
是忱克享於馨茂兆民咸賴用致於輯寧惟震長之至賢
實乾剛之上體三善靡煩於在傳重暉上契於秉陽 陛
下仰奉靈心旁招羣籲以爲主器之重有國莫先知錫羨
於仙源在守成於宗躅增崇巨業屬我元良龜猷之告協
從神鑒之徵允格三讓成魄知天道之好謙明兩作離見
皇圖之可大式備彌文之禮仍新遵德之稱滄以茂辰膺

茲鴻典班輪飭駕奮五采以相宣碧鏤題宮配二儀而胥
永臣以濫叨詞職竊守藩封昭數在庭莫覲鑿旌之美含
和發詠率同鳧藻之誠

謝直集賢院表

夏子喬

北門禁省給青簡以試言東觀直廡降紫泥而命職莫道
假人之刺彌彰遇主之榮竊以承明設待詔之官寔漢朝
之方潤嚴正啓脩書之院乃唐氏之英華濬圖書之淵敞
龍鳳之宇自非弓裘繼世章句名家通授義畀妙之靈篇
閑書笏珥彤之故事則何以繼成康之美頌考宣武之懿
文陪法從於甘泉奉宸游於屬玉況當聖日允屬簡求如
臣者學不傳經文非近史青青子珮雖見刺於勞心翹翹

錯新亦濫期於刈楚筮仕勝衣之歲薦名象日之畿方博
帶以觀光遽墨裘而公牒尋遇國家誕敷尺詔增廣六科
方棲枳以徒勞遂上封而自薦始較文於藝苑旋試可於
鼎司亟趨文石之墀遂忝延英之問擊棘度曲敢望於九
成縈帶分墉俄登於百雉望象河之屬吏佐分虎之方州
爰受代於瓜時遂歸朝於帷坐典陳陳之粟閔山委之丘
區從九九之車總絲棼之案牘暨還衡睢壤舍爵太官既
諧引籍於金閨將佐于蕃之熊軾又慮沉迷簿領廢墜簡
編負公朝振舉之科臺聖主詳延之意遂殺青而奏技果
出綵以推恩禁林俾試於雕蟲書殿遽令於抱槧閣上
帝之冊府日眩星辰登道家之蓬山足踐雲氣奉長者之

餘論與先生而並行分直石渠地接嚴更之守縱觀金匱
門連著作之廷載惟螻蟻之軀莫報乾坤之賜恭惟 尊
號皇帝陛下事寢廟以至孝奉靈祇而克誠流鴻藻於絕
垠鏘景炎於往號以文明而行健體柔克以居高縱觀唐
漢之大猷備舉黃虞之故實睿藻和而六同韻天章麗而
五佐飛恢崇務廣於斯文獎擢不遺於小道遂使至孤之
士獲塵非次之恩東陵遽擬於西山羔裘遂登於狐腋歌
衛風而合雅鸞齋紫而雜良誠當潔節於素絲敢不盟心
於白水益三緘而出語彌九復以窮經永冰淵惕厲之心
奉日月照臨之鑒庶追素飡之謗仰疇明主之知媿懼所
深兢惶不已

進兩制三館牡丹歌詩狀

晏同叔

臣准傳宣劄子奉 聖旨令兩制三館賦後苑諸殿亭牡丹歌詩者化合天人祥開卉木協風靈雨散為膏壤之滋共蒂并柯布在密青之圃畫品難形於卓異瑞圖不盡於芳妍乃詔儒臣各摛華藻匪太平之特盛豈榮遇之及茲昔者虞舜膺期有臯陶之賡載周宣繼業聞吉甫之誦章蓋默助於謨猷不專工於辭翰迨于漢室尤好藝文別館離宮多命從臣之制作倡優鄭衛已無前古之箴規中葉以還其風未泯永平神雀之頌孝明稱美者五人正元重九之篇德宗考第於三等並垂編簡式著熙隆洪惟聖運之會昌可繼重華之輝耀然於衆製未復前脩思諷諭

隱其誠而靡宣局轂律之艷其言而罕實不足以上裨睿覽下達民情效明良起去古之音續雅頌清微之範姑用登高而能賦庶幾博奕之稱賢 叶精求豈任多愧臣首當庸濫實玷恩華與悟以思覲惶無極其兩制并侍講學士龍圖閣待制自章得象已下十三人三館秘閣自康孝基已下二十七人歌詩共一百四十首謹隨狀進以聞

侍講學士等請官中視學表

晏同叔

伏奉 聖旨以時暑暫住講書至秋涼仍舊者運當文治日視^{講書}進以炎暑之盛隆遂紫宸之游息載頌明旨允合舊章以惟 皇帝陛下應運挺生代天化育御承光之法座臨照九闈奉長樂之慈顏庶庇萬務緬懷 三聖撫愛

兆民知王業之艱難。識帝模之宏遠。於是順稽古道。崇尚素風。命冊府之儒臣。啟金華之經席。包胥衆說。既析於篇題。齊魯善言。彌勒於聽覽。屬南薰之屆候。憫會弁之增榮。暫錫假寧。事昭恩遇。臣等退惟鄙質。幸此親逢。敢忘矇瞽之言。仰效涓毫之助。切以四方無事。百度允釐。宮禁之間。穆清多豫。伏願重漢皇之六學。惜夏禹之寸陰。時習所聞。愈精大義。間揮仙翰。式就神功。彰睿德之日新。廣鴻猷之天賦。如此則宗祊景福。替明主之保邦。夷夏仰瞻。識大朝之垂教。

謝除使相判相州表

韓稚圭

宰職隳功。莫副宵衣之治。鄉邦得請。重叨書錦之行。被因

典之特優。顧人言而甚愧。伏念臣早由科第。遂玷寵榮。不圖翰墨之進身。自竭滄塵而報國。備員諫諍。幾不免於竄投。奮命圉疆。實存懼於艱阻。獨恃聖神之眷。惟開援助之言。仁宗皇帝知其守以孤忠。謂可屬於大事。慶曆之始。已擢貳於樞機。嘉祐之中。乃進登於宰輔。俄膺顯任。益荷殊知。當英廟之承祧。逮聖人之嗣服。稠重遭會。罄竭愚庸。惟知社稷之安。豈顧家宗之末。然而萬微多務。一紀妨賢。爲國持平。敢自私於輕重。裁人所欲。固難免於愛憎。加疾疹之嬰纏。苦形神之耗敝。勉訖因山之禮。懇陳上印之宜。伏蒙陛下念犬馬之力。易衰廓日月之明。爲照不罪。再三之請。亟垂開可之音。進秩地官。剖符粉社。建高牙之重。

既疏淮海之封。增故里之光。仍襲貂蟬之舊。叨塵之甚。今古疇借。敢不思盡瘁於寢興。民真懷於內外。在邊在庭之責。惟驅策以當前。益堅益壯之心。至糜捐而後已。

辭起復表

富彥國

喪次卹哀。甫終卒哭。使華傳命。繼至敝廬。心積驚憂。情深屠烈。雖屢傾於丹懇。尚未錫於俞音。天遠莫量。物微難動。不避褻煩之咎。更陳隕絕之詞。必冀神聰俯從。哀請伏念。臣早罹家難。偏奉母慈。猥以蠢愚。最鍾愛育。享祿未幾。遽纏風樹之悲。報德永違。徒懷霜露之感。寢苦枕塊。而適抱至痛。食稻衣錦。則若爲自安。實非人情。尤紊邦制。況今中外無事。左右得賢。共輔聖明之期。安有隳曠之務。曲蒙下

詔更起。孤臣在陛下。陛下。賦國之方。蓋欲不遺於舊物。於朝廷敦化之道。必恐有誤於蒼生。何須稽故事。以遂前世之非。正可存禮經以圖今日之善。行之即是義。不爲難。豈惟於陛下。有復古之風。抑亦俾愚臣得事親之道。一爲匪戾。兩得其宜。兼臣悲傷之餘。衰病交至。精力已耗。神觀未還。假使充員。豈堪應務。苟令終畢於祥禫。庶幾稍復於幹。魂得此從容。可備駸策。伏望尊號皇帝陛下。日月臨照。天地包容。畫母氏平生之恩。憐人子罔極之苦。曲矜末志。得滿鉅憂。生意凋零。或尚未拍於溝壑。清光咫尺。終期伏望於雲天。悲感增深。懇願兼劇。

賀鴻慶宮成奉安三聖御容表

歐陽永叔

臣備言伏覩南京鴻慶宮成奉安三聖御容者一人致孝式表於奉先三后在天並垂於鴻祐人靈交感華夏歡呼臣其中賀伏惟 尊號皇帝陛下以上聖之資撫重熙之運親執玉幣禮天地之神祇時奉丞嘗報祖宗之功德乃眷別京之重載崇原廟之儀衣冠出遊仰稽於故事郡國嘗幸俾得以奉祠實隆廣孝之風以著不刊之典臣猥叨詞職方守郡條瞻盛禮以阻陪效歡聲而徒切

揚州謝上表

歐陽永叔

臣備言准樞密院遞到誥勅一道伏蒙 聖恩授臣起居舍人依前知制誥知揚州軍州事已於今日二十二日赴任訖者賤所脫身遽叨臨於督府歲成無狀仍叙進於官

聯被渥以優撫心增懼臣其中謝伏念臣材非適用行輒違時徒知好古之勤自勵匪躬之節誤蒙獎拔驟玷寵榮小器易盈固已宜於顛覆豈言取禍仍多結於怨仇仰恃公朝臣雖自信在於物理豈有不危矧利口之中人譬含沙之射影謂時之衆嫉者易爲力謂事之陰昧者易爲誣上一作幸繫天聽之聰終辯獄辭之濫苟此寃之獲雪雖永棄以猶甘而況得善地以長人事及親之厚祿坐安優逸未久歲時亟就易於方州仍陟遷於秩序有以見聖君之意未嘗忘言事之臣孤拙獲全忠善者皆當感勵姦讒不効傾邪者可使息心非惟愚臣獨以爲幸此蓋伏遇 尊號皇帝陛下乾坤覆載日月照臨察人常務於究情行賞

必思於有勸致茲恩典施及儒庸誓堅終始之心少答生成之造

謝復龍圖閣直學士表

歐陽永叔

臣脩言今月十八日樞密院遞到詔勅各一道伏蒙 聖恩授臣依前禮部郎中充龍圖閣直學士仍舊知頴州者恩還舊職事雪前誣感極心驚涕隨言出臣其中謝臣伏見前世材賢一作材之士身結主知勲德之臣功施王室然尚或一遭謗毀欲辯無由少忤要權其禍不測顧如臣者何足道哉臣材不迨於中人功無益於當世用之未見其効去之無足可思矧罔極之讒交興而並進易危之迹何恃而不顛而聖心不忘恩意特至辯得欺於曖昧沮仇嫉

於衆多雖暫告譴謫之中而屢被陞遷之渥今又特蒙甄錄牽復寵名以臣之愚豈比前人而獨異推其所幸蓋由聖主之親逢謂宜如何可以論報再念臣稟生孤拙本乏藝能徒因學古之勤粗識事君之節苟臨危致命尚當不顧以奮身況為善無傷何憚竭忠而報國誓期盡瘁少答高明

南京留守謝上表

歐陽永叔

臣某言伏蒙 聖恩就差臣知應天府兼南京留守司事臣已於今月二十四日赴上訖者守宮鑰之謹嚴敢忘夙夜布政條之纖悉上副憂勤寄任非輕兢營並集臣其中謝伏念臣賦才庸薄真數竒也毀譽交興兩嘗過實寵榮

踰分動輒招尤念報效之未伸敢不竭忠而盡瘁困風波之可畏則思遠去以深藏造此六年外更三守學偷安而杜口負素志以媿心朽質易衰已凋零於齒髮良時難得尚希慕於功名豈謂皇慈未捐舊物擢從支郡委以名都惟此別京舊當孔道簿領少勤於職事厨傳取悅於路人苟循俗吏之所爲雖能免過非有古人之大節未足報君

謝明堂置典轉官加勲表

歐陽永叔

臣某言今月十三日進奏院遞到誥勅各一道伏蒙 聖恩授臣尚書吏部郎中加輕車都尉依前龍圖閣直學士仍舊知應天府兼南京留守司事及放朝謝者天地號令風雷鼓行一氣所均萬物咸被遂容僥倖亦與襄升臣某

謝伏念臣材不逮人識非慮遠徒有事君之節未知報國之方冒寵貪榮已踰其量見利臨得曾不知慚此者伏遇 尊號皇帝陛下堯舜聰明禹湯勤儉脩前工之曠典述先志以繼成昭致精裡躬臨路寢膺受上天之多福推與萬方而不私臣於此時限以官守講儀制禮不預議郎博士之流助祭陪祠不在諸侯方物之列既乏一言之獻又無執事之勞徒隨程闕共享餘賜普天率土難異衆以獨辭踣厚謁高但撫躬而無措

謝宣召入翰林狀

歐陽永叔

使車入里君命在門閭巷驚傳豈識朝廷之故事縉紳竦歎以爲儒者之至榮在臣之愚何以堪此竊以文章一作詩

之任自古非輕待遇寵榮至有私人之日詢謀獻納因加
內相之名恩既異於常倫人愈難於稱職伏念臣器非宏
遠識匪該明學不通古今之宜材不識方圓之用久叨塵
於侍從曾莫著於勞能而自出守外藩近遭家禍苟存餘
喘復齒周行風波流落者十年天日再瞻於雙闕進退之
際已蕭颯於霜毛慰勞有加賜憫憐於玉色形神若此志
意可知身已分於早衰心敢萌於希進加以羈危之迹仇
嫉交攻進退動繫於群言論議多煩於睿聽雖覆載之造
每賜保全而孤寒偷安常思引去敢謂伏蒙 尊號皇帝
陛下俯憐舊物曲軫宸慈因內署之闕負俾備官而承乏
臣敢不勉尋舊學益勵前脩感遺簪未棄之仁竭駑馬已

疲之力庶伸薄效少答鴻恩

謝除樞密副使表

歐陽永叔

臣某荷蒙 聖慈除爲樞密院副使者右樞布府允位宜
求於雋賢多士盈庭詔選乃先於庸妄既卒辭之靡獲徒
以寵而爲憂臣某竦懼竦懼頓首頓首伏念少本賤愚初
無志慮爲小人之事力不勝於負薪程有司之文學止期
於干祿過被仁恩之樂育早從英俊之並遊遂叨使從之
流久玷論思之地方時求治殆無補於分毫顧管阜衰況
漸凋於齒髮但思藏縮敢望甄陞矧惟贊萬事之幾必也
極一時之選豈容濫得猥以備員當命令之始行方惶惑
以失措而睿恩至渥召旨其嚴莫諧懇避之誠徒負會祭

之媿此蓋伏遇 皇帝陛下廓天地之量垂日月之光憐
撲直之無他謂駑疲之可免俾承闕之以效拙勤臣敢不
奮勵無能之姿感激難遇之會職思以位庶免於曠官謀
不以身少期於報國

謝參知政事表

歐陽永叔

贊貳國鈞參聞廟論謂宜不次而選冀得非常之材廼以
叙遷俾之承乏誤恩過被訴讓靡從臣其中謝伏念臣少
迫賤貧偶勤學問儒者博而寡要況匪多聞文章世之空
言豈能適用徒以早講亨嘉之會驟蒙獎拔一作之私叨
言語侍從之流逮今踰紀玷出納樞機之任初乏可稱幸
先彈理之未加每欲逡巡而引去敢期眷眷俾與政機優

以寵章進其爵秩望非意榮與憂并此蓋伏遇 尊號
皇帝陛下堯德聰明禹躬勤儉博求俊又以濟治康謂臣
既朴且愚必能循於忠謹雖庸而懦尚可策其疲駑猥以
備員遂茲冒寵臣敢不益堅素守自勉不強惟殫犬馬之
勞上答乾坤之造

謝覃恩轉戶部侍郎表

歐陽永叔

皇明繼照如日之昇睿澤霽流溥天咸被時惟朽懦亦玷
光華臣其中謝伏念臣本以庸虛僅知學問識不周於往
行一作材莫逮於中人方其壯年喜論時事名聲濫得招
謗各以借來榮寵踰涯蹈憂危而亦至晚被先朝之誤獎
俾陪二府之後塵居無補於休明方自期於引避遽號弓

而結恨雖殞體以何追伏遇 皇帝陛下奮發乾剛嗣承
天統當茂業繼文之始乃歡謳歸啓之初宗社獲安人神
洽一作慶矧惟新之號令方無間於幽遐顧於茲時其敢
獨異俯從祗受但益凌兢敢不勉勵衰殘感遇今昔更竭
疲驚之效庶伸塵露之微

辭特轉吏部侍郎表

歐陽永叔

受寵若驚况被非常之命事君無隱敢傾至懇之誠仰冀
高明唯知跼蹐臣某中謝伏念臣性姿庸近識局昏宜學
古自愚非有適時之用論材甚薄豈堪任重之難徒以荷
先帝之誤知自孤生而拔擢大馬未報但虞填壑之有時
弓劍忽遺遽歎攀髯之莫及而屬皇明繼照聖治惟新迭

往事居雖策疲驚而自勵進思退補未知罪戾之所逃至
於貪踰分之寵榮冀無功之爵賞非惟愚慮所不敢及顧
有公議止將謂何而甫茲彌年再以增秩方今書之始下
駭群聽以生疑此臣所以剖瀝肺肝不能自止彷徨夙夜
莫獲偷安伏望 皇帝陛下日日月月之餘光廓乾坤之大
度察其悃幅一作假以矜寬雖成命已行國體當嚴於出
今而從人之欲天高幸或於聽卑特收渙汗之恩以息誼
諱之論庶安常業誓畢愚衷

謝特轉吏部侍郎表

歐陽永叔

驟膺渙渥備瀝愚誠雖至辭窮罔避煩言之為黷重乎令
出莫回成命於已行祗受以還驚一作惶夫節臣某中謝

伏念臣學不通於元本材不足以經綸但知守拙以為忠
每務師心而自信徒以遭逢先帝拔自衆人又參侍從之
聯遂玷機衡之貳而屬大橫啓兆嗣統膺期方初政之清
明思百度之脩理內量謙薄實憂以聖而責愚矧迫衰殘
方念乞身而告病不謂皇慈曲被寵數屢加當覃大慶之
初已無功而冒賞曾未踰年之久復進秩以叨榮此蓋伏
遇 皇帝陛下聖政惟新用人務廣謂才難於求備思悅
使以忘勞憫其勤劬錫以優洽雖榮踰於望表亦寵與其
憂并誓殫犬馬之微少答乾坤之造

辭覃恩轉左承表

歐陽永叔

臣其伏奉制命蒙恩特授臣行尚書丞丞依前參知政事

加增食邑食實利及賜功臣者澤施無外雖務極於汪洋
寵至若驚實難安於落無敢傾拙訥上躡高明臣某中謝
伏念臣本以妄庸早由平進一經之學乃自守之迂儒十
駕其駕終不堪於遠用徒以且暮千載遭逢兩朝擢貳鈞
衡坐淹歲月國恩未報但虞填壑以遺羞金鼎已成豈謂
榮胡之莫及幸遇 皇帝陛下重離繼照正統當天萬物
覩而欣忻大號渙其均慶致茲孱朽亦玷光華然夫位高
而危顛者定亦其勢然器滿而必覆者蓋由於量過敢忘
承權誠迫懇私伏望 皇帝陛下特軫睿慈俯矜愚守當
萬機之新政收厚賞於無功則臣雖蒲柳之易一作衰尚
冀消埃於後效

謝軍中轉左丞表

歐陽永叔

六慶均行滂流而其甚溼鴻恩曲被俯儀以無容臣其中謝
伏念臣性質迂愚器能淺陋言不足以備典謨之奧學不
足以通治亂之原徒以早荷兩朝之誤知拔自孤生而獎
用疲駑雖一作難勉訖無補於毫分歲月屢遷猶坐貪於寵
綠方懼黜幽之典敢希冒進之榮此蓋伏遇 皇帝陛下
光紹寶圖惟新聖政繼離明而大照推乾施以無偏致此
妄庸首霑渙汗臣敢不退思驚懼益勵衰疲感風雲際會
之難依日月光華之未少圖後効冀盡夙心

謝觀文殿學士刑部尚書表

歐陽永叔

職清書殿寔爲儒者之榮均峻天臺仍忝刑官之重內循

謝薄仰玷光華臣其中謝伏念臣稟質迂愚粗知業履因
時幸會遂竊寵靈無拾遺補闕之勤常陪法從非大冊高
文之手久廁翰林晚綴宰寮評聞國論荷三朝之眷遇每
察懦衷幸四海之清平得容一作祿居滿盈而不戒積災釁
以自貽屬聖統之嗣興赫皇明而繼照誣言詰服已大釋
於群疑危跡保全俾不虧於素守大馬合思於報效桑榆
奈迫於衰遲屢貢懇私上干聰睿遂蒙開允俾解繁機然
而晚節餘生本期避寵清資顯秩益更貪榮被優渥之非
常但凌兢而失措此蓋伏遇 皇帝陛下聖神御極亨育
推仁閔孤拙之勢危無容自立謂疲駑之力竭難責遠翼
曲軫至慈俯從誠請仍憐舊物特示殊恩顧非木石之頑

宜識乾坤之造。嗚呼。素領雖難強於筋骸。皎若丹心。猶自期於塵露。

亳州謝上表

歐陽永叔

貳政非才。雖獲奉身而退。分符善地。猶懷竊祿之慚。祗荷寵靈。惟知戰懼。伏念臣章句腐儒之學也。豈足經邦斗筭。小器之量也。寧堪大用而叨塵二府。首尾八年。荷三朝之誤。知整一心而盡瘁。若乃樞機宜慎。而見事輒言。陷筭常前。而無身不避。竊尋前載。未有能全一昨。怨出仇家。構為死禍。造誘于下者。初若合沙之射影。但期陰以中人。宣言于廷。考遂肆鳴梟之惡。且孰不聞而掩耳。賴聖神之在上。廓日月之至明。悉究罔誣。遂投讒賊。再念臣性實甚愚。而

踈於接物。事多輕信者。蓋以至誠如彼。匪人失於泛愛。平居握手。惟期道義之交。延譽當朝。常呼齒牙之論。而未乾薦禰之墨。已彎射弄之弓。知士其難世。必以臣為戒。常情共惡人。將不食其餘。而臣與遊。既昧於擢賢在滿。不思於將覆自貽。禍釁幾至。顛躋上煩。睿聖之保全。得完名節。於終始。洎懇辭於重任。尤深惻於皇慈。雖避寵辭。隆僅能去位。而清資顯秩。愈更叨榮。莫逃僥倖之譏。實負心顏之覲。斯蓋伏遇 皇帝陛下。乾坤大度。堯舜至仁。察臣自取於怨仇。本由孤直。憫臣力難於勉。覆蓋迫衰殘。既獲免於非辜。仍曲從於私欲。遂同萬物。俾無失所之嗟。未盡餘生。敢忘必報之効。

謝賜仁宗御集表

歐陽永叔

臣某言伏準御藥院告報伏蒙 聖慈賜臣仁宗御集一部一百卷者俾彼雲章方聯於寶軸刻之玉版忽被於恩頒臣某中謝恭惟 仁宗皇帝睿哲聰明寬仁恭儉每虛心而訪道務嚮學以崇儒天縱生知臻作者之謂聖功高德盛由煥乎其有文伏惟 皇帝陛下纂紹丕圖善繼先志惟 仁祖發揮於衆製乃 英考序述而成編昭如三光並照萬物法彼後世同符六經方副本之頒行非近輔而莫獲敢期睿眷尚及愚臣寵異群邦先生部室載念臣出身寒苦自少遭逢晚蒙獎任之殊常與賡歌之後捐軀論報餘生已負於素心拜賜爲榮撫事但零於清血

乞致仕表

歐陽永叔

臣近貢封章乞還官政伏奉詔答未賜允俞退自省循奚勝殞越臣聞神功不宰而萬物得以曲成者惟各從其欲天監孔昭而一言可以感動者在能致其誠敢傾虔至之心再黷高明之聽伏念臣本以一介之賤叨塵二府之聯知直道以事君每師心而自信然而既乏捐軀之効又無先覺之明用之已過其分而曾不自量毀者不堪其辱而莫知引去幸賴乾坤之再造得逃陷穽之危機仍許避之要權俾退安於晚節今乃苦於衰病莫自支持顧難冒於寵榮始欲收於骸骨既期聖念過軫天慈謂雖迫於桑榆未忍棄於葦菴竊以古今之制沿襲不同蓋由兩漢而來

雖處三公之貴。每上還於印綬。多自駕於車轅。朝去朝廷。暮歸田里。一辭高爵。遂列編民。豈如至治之朝。深篤愛賢之意。每示隆恩之典。以勸知止之人。故雖有還政之名。而仍享終身之祿。固已不類昔時之士。無殊居位之榮。然則在臣素心。雖竊退休之志。迹臣所乞。尚虞僥倖之譏。伏望皇帝陛下。惻以深仁。矜其至懇。俾解方州之任。遂歸環堵之居。固將優游垂盡之年。涵泳太平之樂。惟辛勤白首。迄無一善之稱。孤負明時。莫報三朝之德。此爲慙恨。何可勝陳。

青州謝上表

歐陽永叔

掌國五兵。叨進中臺之秩。宣風一面。俾綬東土之人。祇尚

寵靈。徒知殞越。臣基中謝。伏念臣學非通敏。材實空疎。幸逢千載之休。叨誤被三朝之獎。擢久陪法從。嘗與政機。國恩未報。而身已先衰。世塗可畏。而命亦多蹇。頃緣災疾。遂決退休。敢期上惻於皇慈。未忍遽捐於舊物。而復過推優渥。以慰癯殘。惟孤拙之無堪。蹈艱危一作虞而已。甚世之所榮者。臣之所懼。人以為寵者。臣以為憂。是敢輒殫悃幅之誠。累黷高明之聽。迫於危慮。罔避煩辭。而聖度并容。寬其罪戾。恩言屢降。譬以下寧。知成命之難回。勉覲顏而祇受。而況全齊舊壤。負海奧區。民俗富完。而鑿井耕田。各安其業。詔條寬大。而奉法守職。足以脩官內省。庸虛奚勝。忝幸此蓋伏遇 皇帝陛下。日新來治。天覆推仁。謂簪履雖爲

於賤微尚堪收錄而大馬苟豐於豢養猶可使令臣敢不策勵疲羸勤思夙夜庶期盡瘁少答鴻私

謝南郊加食邑五百戶表

歐陽永叔

紫壇高峙式薦於精禋皇澤霽流推行於大慶祗膺寵數伏切兢管臣其中謝伏惟皇帝陛下出震膺期繼文興治百度講明於新政群生涵泳於至和乃考舊章聿思報本謂二歲一郊之禮必舉以時俾四海九州之人並受其福遂因景至躬款陽丘萬國充庭其誰敢後六卿聯事各以其官而臣職忝頒條位拘守土執豆蓬而祗役罔獲施勞遠輝翟之餒餘遽蒙均惠無功受賞莫違俯偃之辭盡瘁事君惟誓糜捐之効

謝賜漢書表

歐陽永叔

臣某言臣伏蒙聖恩賜臣新校定前漢書一部已於今日據進奏院遞到臣已祗受訖者俯躬承命拭目生輝臣其中謝竊以右文興化乃致治之所先著錄藏書須太平而大備惟漢室上繼三代之統而班史自成一家之書文或舛訛蓋其傳之已久詔加刊定俾後學之無疑一新方冊之文增煥秘書之府而奏篇之始方經衡石之程賜本之榮惟及鈞樞之近敢期孤外特與恩頒此蓋伏遇皇帝陛下曲軫睿慈俯矜舊物謂其嘗與臣隣之列不忍遽遺憐其自喜文字之間俾之娛老然臣兩目皆眊雖嗟執卷之已艱十襲珍藏但誓傳家而永寶

謝擅止散青苗錢放罪表

歐陽永叔

有罪必誅是為彝典原情以恕特出深仁聞命驚慚省躬涕泗臣某誠惶誠感伏念臣以一介之微賤荷三聖之獎知寵祿既豐初無報効筋骸已憊尚此遲徊曲蒙大度之并容感蒙一方之寄任職當撫俗貴在分憂方茲盱眙之勞心豈敢因循而避事昨遇國家新建官司而主計大商財利以均通分命出使之車交馳於郡縣悉發舊藏之銀取息於民氓而臣方久苦於昏衰初莫詳其利害既已大誼於物議始知不便於人情亦嘗略陳衆弊之三冀補萬分之一屬再當於班給顧已逼於會期雖具奏陳乃先擅止據茲專輒宜被譴呵豈謂伏蒙 皇帝陛下深軫睿慈

俯矜朴拙免從吏議特貸刑章夫何草木之微曲被乾坤之施臣敢不益堅祗懼更勵操脩戒小人之飾一作非希君子之改過冀圖薄效少答鴻私

乞致仕第二表

歐陽永叔

睿訓丁寧曲加諭慰愚忠懇迫尚敢黷煩將再干於冕旒宜先伏於砧鑕伏念臣世惟寒陋少苦竒屯識不達於古今學僅知於章句名浮於實用之始見於無能器小易盈過則不勝於幾覆徒以早際千齡之亨會誤蒙三聖之獎知寵榮既溢其涯憂患亦隨而至稟生素弱顧身未老而先衰大道其夷蹇力不前而難強每念恩私之莫報兼之疾病以交攻爰於守宅之初遂決窟窟漳之計逮此三遷於

歲律又更兩易於州符而大馬已疲理無復壯田廬甚邇
今也其時是敢更殫螻蟻之誠仰冀乾坤之造況今時不
乏士物咸遂生鳧鴈去來固不爲於多少鳶魚上下皆自
適於飛潛苟遂出於殘骸庶少償其夙志伏望 皇帝陛
下哀憐舊物隱惻至仁察其有素非僞之誠成其識分知
止之節曲從其欲賜報曰俞俾其解組官庭還車故里披
裘散髮逍遙垂盡之年盤井耕田歌詠太平之樂其爲榮
幸曷可勝陳

乞致仕第三表

歐陽永叔

恩深煦嫗感激涕洟雖情有所迫於危心不知自止而辭已
窮於累牘幾至無言惟以至誠期於必達自乞憐於君父

不復信於著龜伏念臣家世單平性資中下少從宦學本
免饑寒不自意於遭逢遂進階於華顯然而群材方茂蒲
柳未秋而早衰衆駭並馳駑駘中道而先乏而况荷難勝
之任用竊逾分之寵榮風波憂畏而慮以深疾病侵凌而
老亦至故自辭於機政即願謝於軒裳蒙上聖之至仁念
三朝之舊物每曲煩於訓諭久未隱於棄捐竊惟臣知事
君必本忠信言不顧行是爲罔欺而臣口日誦於田間身
坐會於祿利可畏至公之議何施有覲之顏每自省循莫
遑啓處是敢罔避再三之煩黷猶希萬一之矜從伏望
皇帝陛下特軫天慈俯回睿聽察前言之可復蓋屢請之
有年哀下愚之不移渾卒成於素志徇其所欲乞以殘骸

臣若得上印綬於有司自駕柴車而卽路晚節知無以大過沒身永荷於鴻私

謝致仕表

歐陽永叔

愚誠懇至曲軫於皇慈寵命優殊特加於常品本期得謝更此叨榮臣其中謝伏念臣猥以庸近之材早邁休明之運不通之學既泥古以難施無用之文復虛言而少實是以三朝被遇四紀復勞蒙德重於丘山論報亡於毫髮而年齡晚暮疾病厄殘輒希知止於前人不待及期而後請自陳悃悃屢至瀆煩既久歷於歲時始曲蒙於開可仍超加於異數非止賜於殘骸道愧師儒乃承春宮之峻秩身居畎畝而兼書殿之清名至於頭垂兩鬢霜毛腰束九

環之金帶雖異負薪之里一作何殊衣錦之歸使閭巷咨嗟共識聖君之念舊措紳咸悅皆希後福之有終豈惟愚臣獨受大賜此蓋伏遇 皇帝陛下無私覆物博愛推仁以其夙幸遭逢密契風雲之感會曾經服御不忘簪履之賤微致此便蕃萃于衰朽雖伏櫪之馬悲鳴難戀於君軒而曳尾之龜涵養未離於靈沼餘生易畢鴻造難酬

賀南郊大赦表

宋孝宗

帝儀訖饗朝渙推慈飛驛疾傳庶邦叢慶切以天郊之重國制有常凡萬乘躬行必三歲間往不煩不怠由列聖而持循以妥以虔合諸神而褒對睿圖累盛縉典勤脩恭惟尊號皇帝陛下纂大合華執中布度抵金壁之珍玩率儉

示人收霜電之嚴威。措刑於下。克勵明德。格於皇穹。交薰
大和。冒我群品。顧懷時億。瑞應日來。亟戴上儀。若祗舊典。
戒期百執。領詔九州。曳雲威之徜徉。服翠蚪之泮渙。殊庭
一獻。諸祐徧躋。遂自陽靈之宮。往會天元之日。羽旄四合。
埃陛參登。上璧左琮之華。合祛而信。祝祖絕宗。題之次更。
侑而迪嘗。拜嘉胙於席。垂列欽棗於雲表。靈心合答。熙典
備成。然後還坐。中天之闡普。肆隨風之澤。改頒大號。崇冠
初元。昭神之祥。祈命惟永。賞功赦罪。已責逮瘵。咸與惟新。
滂民衷而遷善。聿懷多福。道帝祉於縣區。盛際有光。彝倫
咸賴。臣嚮官舊吏。殫見往朝。或不愛牲玉爲恭。殊非明薦。
或所過租賦爲復。蓋出重勞。語昔罕全。訂今絕擬。所恨清

塵在望。自若周南之留紫橐。仍持不與甘泉之從。第班恩
諭均泱。歡悰

代人乞出表

宋子京

臣聞物勝於權。則衡爲之殆。馬竭其力。則御速於顛。蓋以
器循量而易施。材過求而難勉。是以功名之際。惟髦士可
居。疆力之容。匪暮年勝任。將傾危懇。敢援斯言。竊念臣本
以丘樊托于經術。幸逢先烈。超備從官。服上教之彌文。因
至愚而取信。出入丹禁。無所建明。履歷藩宣。蔑聞條教。

尊號皇太后陛下 尊號皇帝陛下 奉承謨訓。過聽空踈。

簡服在庭。兼容如地。雖百度之治。咸使與聞。每萬機之餘。
常參勸講。七周成歲。訖之寸長。惟君知臣。足以驗其無用。

惟國有典不可追於出幽且自知甚明內省尤熟以一介
之鄙賤丁千載之會昌邑戶食錢非祿之不厚高冠大佩
非位之不崇同僚皆賢非志之不合處奏多可非言之不
從固當勉服攸箴謹俯爾職答乃聖之眷遇爲斯文之寵
光其如犬馬齒衰桑榆景薄中年則病奪其壯晚節則務
傷於神辭色立朝足居多於跋倚書思記命自不辯於馬
烏而臣頃自去秋願辭近職上恩不聽寵渥就加逮黽勉
以及茲且憊昏而益甚事皆忘誤疾愈尪癯顧四體之已
疲宜一辭而後止重念臣之鄉籍世占鄆州既託枌榆薄
營產利不勝首丘之志願詣剖竹之行庶及餘年聊蘇疲
瘵況前朝刑昷本貫曹州亦自禁廬得臨鄉部臣今所請
千畝鑒伏俟嚴誅

謝衣襖表

宋子京

似有前規伏望 陛下念舊物之不可遺憫孤生之老且
至特垂寬詔俾守先廬亦大君進退之間微臣止足之
分萬無纖介可貽累於至仁一切便宜尚力懇於卧治仰
千畝鑒伏俟嚴誅

冬籥乘辰裘官者令疾馳使驛臨撫寒屯並頒齊筭之良
均挾吳縣之煖被躬且吉束帶有華伏惟 尊號皇帝陛
下至德誕敷深仁普愛念官師所以卒歲恐天下有受其
寒据泰軫窮當舒慮慘況悽其戒序必測然動心特以濱
寒沍嚴持兵軼露句傳温詔緘褚紋袍爛然晝鮮煦若春
至矧部校什長賜各有差僻壘窮郭悅而忘苦振裾交林

聯藝相趨和氣暢茂顧折膠而何畏大恩壓已憂稱服以
為難有可仰酬不知輕殞

謝換龍圖表

宋子京

傳直禎門徒恩層閣本緣親而自乞蒙引籍以對除揆寵
兼常無顏容愧竊惟先聖有作叢構實與鬱律及居之嚴
襲積霧圖之廣臨畢創職稱是取材肇允榮塗何嘗輕授
伏念臣識局庸淺術學膚孱入參玉堂聞陪講殿徒以朴
忠無飾孤耿自將時湜湜於涇清守嚶嚶於兩晦賴天燾
煦曠日保全適以臣凡庠召自外藩復參大政理所宜避
地不處嫌稽首請問素言叙懇丐上還於禁籍得專侍於
經惟伏蒙 尊號皇帝陛下見謂由衷特從換秩罷茲要

近處以清閑拂此儼之塵容履蟪蛄之寶宇伏況臣出入
三歲便蕃五遷四叨學士之名罕見從官之比雖素領焦
禿病幹准攬器極斗筲之容利止鉛刀之割尚當勉懦為
立續短俾長儻有補於消銖失不忘於墮蹄

謝加端明素

宋子京

乘塞無狀增秩蒙褒賜予侑頌心顏交斬伏念臣才弗振
俗生偶逢時備內朝臣十有六載學未足膺天子之問文
無以代王者之言遂圖外遷冀云少補惟定武一道契丹
右延咸平以來號勁兵處自夏竦分建四師韓琦始領九
州節制中軍部分諸將琦既進律臣實代居以一介懦儒
當萬天惡任詎難辭劇奮靡顧愚然臣所習者藝文未曉

者軍旅用非所習雖勤而弗效責於未曉故技有必窮用
是再暮居無底績在法云殿惟黜是宜敢謂 尊號皇帝
陛下憫久戍之勞排彼譖之後雖遠猶錄謂拙可矜收雲
閣之故資著丹殿之新籍仍秩經省未易守藩叢香徽章
夸矯鄙邑重降嚴旨切却讓封臣亦內揆愚心旁論公議
若循禮疊請則恐涉不誠或固節還恩又似規早罷不有
衆使誰扞邊疆例格除音孰尊寵數輒昧涯分祇服器名
日三省以自營身九殞而奚報但臣所念者邊務至重虜
詐益滋得人失人繫今日輕重知己知彼爲天下安危而
有司特用苛法相挺守臣類以生事爲解封候畏怯不敢
擢手倉庫虛乏正可寒心建明累上而朝省未從姑息小
擢授知榮

代陳州章相公乞致仕第一表

宋于京

虧則謗囂立至況臣衰晏素自秦寘判無成功徒忝休命
望審擇於豪俊俾臨統於方隅設張遠謀羈制驕狄因釐
敷於感臆竊附列於贅言朔壘地卑君門天阻被符蠲謁
攬授知榮

臣聞器有所極彊之者必顛志有所安違之者將敗是故
智士不窮量以邀受仁君無嘯願以責功內顧危惊敢援
茲喻伏念臣姿力駑下術略迂踈蒙幸中人之材待罪宰
相之府寵與時進負隨日深謀謨弗良彫紊相踵羗夏有
未纓之醜關陝多無聊之人權盜跳梁箕晉燭結杼軸罄
於編戶扞皮蠹於遠方上貽焦勞外謹謏訥各不臣執罪

將孰歸比者荐歷肝膺願乞骸骨冀蒙不職之宥以贖安
用之辜 尊號皇帝陛下包納荒遐親喻戒敕須訖郊丘
之享乃許却綬之還褒亮所加諄慈兼至臣此時外迫大
誼中忘至愚敢優游以自安輒皇恐而視事然而智慮淺
局年鬢頽侵短臂屈長袖之前疲足困新羈之左覲然尸
位倏又彌年所賴 陛下以百姓爲心天下爲度捨未爭
而納戎帳之款捐滯積以撫遼社之和克展上儀遂布鴻
慶永惟橫目之庶方就覆盂之安臣之及茲可謂天幸過
此不止其如罪何雖大度之見容在輿議之難遏抑又聞
當退而進者侮必及宜黜而用者傷必多高位乃身歿之
媒厚祿爲衆怨之舍借令臣冒厥明戒苟留上司玷廟廟

之儀刑被史家之貶戮死有餘咎仁弗忍爲伏望察如丹
之誠憐指景之慕遂容納政早獲省私亦不必窮喋喋之
言凡垂開可惜齷齪之謹妨用俊良虔冀日喻誓無但已

賀生皇子表

宋子京

臣祁上言寶祐叢休天支毓秀慶騰秘禁歡溢神州恭惟
皇帝陛下受命溥將凝圖丕赫權綱相又根乎克念之虔
簡素所安表於不免之懿且復輕刑薄賦重穀厚民一方
少饑則係馳使節白金稍乏則輒續禁錢民用靖嘉神罔
恟然以上帝歆佑三后顧存貽美孫謀昭衍無疆之烈
歸功元首茂啓多男之祥誕協仲商挺生哲嗣星弧具禮
天第交華惟翕闢之儲英固覃訃而絕異迹聆詔諭並仰

獻儀薦笏相趨忤吾君之有子珪璋流愛宜天下之繫心
臣始去近聯遽承告語賡歌綿旆早知周德之遐參祝祠
禱罔遠漢臣之幸

乞致仕表

張方平

切以大君保息之慈人之老者疾者得所養治國經常之
制仕之進者退者惟其宜不堪陳力之勞爰上乞骸之請
詔函下降天旨未俞臣聞委質大方前經明訓自古不得
謝者在禮雖或有之然皆德業高賢功勳夙望邦家倚以
為重中外賴之為安加恩所以特優被寵誠為無愧是以
義全大體衆罔間言如臣徒以空疎早蒙東擢事猷弗建
報稱茂施遠及衰疲遂求引罷而更濫當渥命遙領真

位陪執政之班祿倍大夫之秩職憂靡預官責不加上紊
彝章俯慙私倖敢循舊典謹復自陳伏惟 皇帝陛下
一氣均私大圓丕冒匹夫自盡各伸所志之微萬物由庚皆
受曲成之賜俯諒虔勤之懇特垂開可之恩精鶩紫宸猶
結望雲之戀迹還白社終懷樂聖之心

服闋謝復官表

孫沔

苴麻之服方爾外除綸綍之言驟然下及矧不移於舊序
仍獲處於近聯拜賜之深竊寵為甚伏念臣出自單緒偶
階盛時無近疆之依以進身惟清素之業以自立鄰由宸
眷升漸禁塗固常入備諫員出分使委雖明目張膽內屢
輸於忠言而竭力勉心外未揚於民最旋以邊烽小警王

師有為朝廷擢以常僚假以煩使兵儲之寄固已屢更邊
帥之權亦嘗冒處歷踐數任甫逾七年轉漕非能偶芻粟
之充給招懷寡術幸部落之妥安以慈親之耄期益精力
之衰耗力陳愚素仰清宸聰察辭益部之行適遂秦都之
請故雖嘗拜命曾未莅曹果家難之纏哀奉靈輿而歸葬
偶全餘息以畢通喪生意茂然榮望已矣此蓋伏遇 皇
帝陛下恢天地容蓋之德廣日月照臨之明以犬馬之勞
曾屢膺於驅策而涓埃之益嘗有補於高深降中旨以召
還俾參華於舊貫復接小銓之秩再躋延閣之榮敢不謹
脩吏條勤瘁王事昔焉為養尚當避危而就安今也卽祇
自可以身而許國誓圖大効庶答鴻休

揚州謝上表

劉敞

一介之材善無所取千里之地任不為輕仰戴恩華退增
慙懼臣聞事上之行莫若愛君而愛君之臣莫重去國汲
黯遺言李息望之致意本朝古今美談賢哲餘事況臣本
以薄技邁茲昌辰幸得出入周備之中優游侍從之末持
橐簪筆庶幾其奉勅勸佩衡之以白以其輕去嚴密之
奉偷得便安之私以謙避親中以奉令因事補史朝廷
通規幸蒙以之以治之選伏遇 皇帝陛下天
度容物聖資盡人登以之誠非有違象魏之意察以
猶足寄民社之安沛以之委以符竹敢不勤恤入以
宣上恩自劬固陋之心以幾樂易之政

謝加學士表

劉敞

常人之情得以求而喜智者之慮過其任而憂今邊備雖嚴帥責望為重事雖衆儒選實難豈有貪就應敵之求忽忘非分之榮臣欣懼兼懷固欲辭榮未獲承命伏念臣猥以淺陋臣起於諸生內之無子產潤色之才外之無山甫將明之用久典訓誥薦臨藩垣七年于茲微效不立猶以陪外廷之末聞長者之風問蒙分章平議臣之奏時引大體正宗廟之儀苟圖納忠非敢迂物然而讒人飾詞以巧詆法吏挾怨以中傷當是之時幾無以免聖心先覺公議尚存浸潤之說不行震驚之衆為止風波可畏天幸實多內私自憐懼久得罪輒旬千里之守庶警一毫之行

不謂尊號皇帝陛下生成此全覆露無已進預金華之講增重儒林之光委以西州適其素願望非所及幸不可涯夫匹夫一飯之恩庸七然諾之信猶能捐生出死成功立名況臣連數十城之封兼四石之重於以宣明威信撫養細民盡其愚忠庶免大悔以此圖報敢為虛言

賀皇長子封公表

王君貺

伏以建統授社屏翰於王家封子維城安疆於國幹誕揚休命敷告群倫均海宇之歡心洽朝廷之大慶竊以宗藩錫瑞賢戚分疆周列侯邦半諸姬而石漢有天下非劉氏則不王皆所以滋大本枝維持宗室綿鼎數於穹壤固廟祐於山河屬我熙朝益隆茂典恭惟尊號皇帝陛下

纂承皇序恢闡洪圖善過孫謀適遵祖構乃眷元良之重
已昭岐嶷之英肇啓罔圻崇加上壤離明震豫知帝緒之
無疆海澗星暉戴吾君之有子臣居留近甸亦遠
聽恩章輿增忭懌

名家表選卷之二

